

雅

倫

雅倫卷之二十

成都費經虞撰男密補江都後學干

品衡

文心雕龍曰才有庸雋氣有剛柔學有淺深習有雅鄭
竝情性所鑠陶染所凝是以筆區雲譎文苑波詭者矣
故辭理庸雋莫能翻其才風趣剛柔寧或改其氣事義
淺深未聞乖其學體式雅鄭鮮有反其習各師成心其
異如面若總其歸塗則數窮八體一曰典雅二曰遠奧
三曰精約四曰顯附五曰繁縟六曰壯麗七曰新奇八

曰輕靡典雅者錄式經誥方軌儒門者也遠奧者複采
典文經理立宗者也精約者覈字省句剖析毫釐者也
顯附者辭直義暢切理厭心者也繁縟者博喻釀采燁
華枝派者也壯麗者高論宏裁卓爍異采者也新奇者
擯古競今危側趣詭者也輕靡者浮文弱植縹緲附俗
者也故雅與奇反與與顯殊繁與約舛壯與輕乖文詞
根葉苑囿其中矣若夫八體屢遷功以學成才力居中
肇自血氣氣以實志志以定言吐納英華莫非情性觸
類以推表裏必符豈非自然之恒貲才氣之大略哉夫

才有天資學慎始習斲梓染絲功在初化器成綵定難
可翻移故童子雕琢必先雅製沿根討葉思轉自圓八
體雖殊會通合數得其環中則輻輳相成故宜摹體以
定習因性以練才文之司南用此道也

唐司空圖作詩品二十四則一雄渾二冲淡三纖穠四
沈著五高古六典雅七洗鍊八勁健九綺麗十自然十
一含蓄十二豪放十三精神十四縝密十五疎野十六
清奇十七委曲十八實境十九悲慨二十形容二十一
超詣二十二飄逸二十三曠達二十四流動

類編云凡詩風韻朗暢曰高體格開放曰逸放詞正直曰真緣境不盡曰情含蓄多致曰思性情疎野曰閒蕭疎曠誕曰達立言磅礴曰意體裁輕健曰力情中靜曰解意中遠曰遠

費氏曰風雅包羅廣博非可一端求一格定也三代之詩微言動物謂之風故比興多而賦少直陳時事謂之雅一意稱禱謂之頌故賦多而比興少風之體微而婉雅之體正而莊頌之體簡而重此其大略也自王迹息而詩亾至漢始開流而爲魏晉六朝隋唐以至宋元近

代辭旨多端名家輩出要必自三百篇而遞及於後間
嘗論之譬之花然紅黃紫白其色無所不有疎密長短
其狀無所不備清穠遠淡其香無所不佳竝寫春華各
成清妙譬之鳥然鉅者細者長喙短喙長脰短脰或一
色羽或衆色羽或高飛低飛大鳴小鳴不得取芙蓉芍
藥而謂馬蘭澤蘭之非花也不得取鸞鳳鶴鶴而謂鶴
鷄伯勞之非鳥也今此一人焉愛一花遂謂衆花不足
觀也彼一人焉復愛一花又謂衆花不足觀也此悅一
鳥彼悅一鳥衆鳥擯棄何其僻歟且欲執一人之見思

以易天下之耳目非愚則誣矣詩品之說起於鍾嶸然三百篇分風雅頌而風有正變雅有大小則詩品相殊三代已然矣唐司空表聖以一家有一家風骨乃立二十四品以總攝之蓋正變俱采大小兼收可謂善矣然有孤行者有通用者猶當議焉其曰雄渾冲淡纖穠高古典雅綺麗自然豪放疎野飄逸各立一門如洗鍊含蓄精神實境超詣流動形容悲慨之類則未可專立也雄渾有雄渾之洗鍊冲淡有冲淡之洗鍊纖穠有纖穠之含蓄高古有高古之含蓄典雅有典雅之精神綺麗

有綺麗之精神也又勁健沈著不外雄渾縝密不外典雅委曲不外含蓄清奇曠達不外豪放故因其原品損之補之定爲上中下品引古人詩以立準先取三百篇而加測焉詩雖經傳六義高淡不可以文辭取不可以斷截求而出言有章亦各區別後人祖述遂成格體略舉一二相維辟公天子穆穆率見昭考以孝以享典雅也抑落控忌抑縱迭忌予所蓄租予口卒瘁古與也我有嘉賓鼓瑟吹笙伐木丁丁鳥鳴嚶嚶清新也許謨定命遠猷辰告烈文辟公錫茲祉福雄渾也子之不淑云

如之何琴瑟在御莫不靜好幽秀也及河裔嶽允王維
后無此疆爾界陳常于時夏深厚也問我諸姑遂及伯
姊女子有行遠父母兄弟自然也采采芣苢薄言采之
標有梅其實七兮淡遠也唯葉萋萋黃鳥于飛巧笑倩
兮美目盼兮俊逸也織文鳥章白旆央央朱芾斯皇室
家君王高老也十畝之間兮桑者閒閒兮泌水之陽可
以樂饑疎野也彼澤之陂有蒲與荷蜉蝣之羽衣裳楚
楚輕細也如金如錫如圭如璧陰鞠鎔續文茵暢轂綺
麗也誰謂爾無羊三百其羣於我乎夏屋渠渠今也每

食無餘峭別也桃之天天其葉蓁蓁何彼穠矣花如桃李穠郁也有美一人婉如清揚子惠思我褰裳涉溱澥潔也俟我於著乎而充耳以素乎而叮嚀鹿場熠燿宵行刻琢也詩人意味浚長橫見側出左宜右有固未可定以品題爲之細加抽繹後有則倣取爲規度故此諸品雖未敢曰以盡風雅而亦覺無以復加矣學士大夫志於藝苑稽之古人必尋源委出於獨見必合準繩庶幾近道若夫麤辭俗字鄙意蕪篇此在風雅之外如蔓草荒藤原非花類飛蟲走鼠不入禽倫又烏可相竝而

論哉

古奧

古者其色澤幽澹與者其意致遼遠商彝周鼎絕代靈殊枯矢專車人所不識非難字僻辭刻澁聲牙便謂隔絕時流追崇先代也

初到陸渾山莊

宋之問

授衣感窮節策馬凌伊關歸逸人趣日覺秋琴閑寒露衰北阜夕陽破東山浩歌步岑樾栖鳥隨我還

故著作郎貶台州司戶滎陽鄭公虔

鵝鴈至魯門不識鐘鼓響孔翠望赤霄愁思雕籠養
陽冠衆儒早聞名公賞地崇士大夫况乃氣清爽天然
生知姿學立游夏上神農或闕漏黃石愧師長藥纂西
極名兵流指諸掌貫穿無遺恨蒼葢何技癢圭臬星經
與蟲篆丹青廣子雲窺未遍方朔諧太枉神翰顧不一
體變鍾兼兩文傳天下口大字猶在榜昔獻書畫圖新
詩亦俱往滄洲動玉陛寡鶴誤一響三絕自御題四方
尤所仰嗜酒益疎放彈琴視天壤形骸實土木親近唯
几杖未曾寄官曹突兀倚書幌晚就芸香閣胡塵昏塊

春反覆歸聖朝點染無滌盪老蒙台州掾泛泛浙江槩
履穿四明雪飢拾糟溪橡空聞紫芝歌不見杏壇丈天
長眺東南秋色餘颺颺別離慘至今班白徒懷曩春深
泰山秀葉墜清渭朗劇談王侯門野稅林下鞅操紙終
夕酣時物集遐想詞場竟疎闊平昔濫吹獎百年見存
沒牢落吾安放蕭條阮咸在出處同世網他日訪江樓
含懷述飄蕩

貽韋鍊師

儲光羲

精思莫知日意靜如空虛三鳥自來去九光遙卷舒彩

地近天井玉宇停雲車余亦苦山路洗心祈道書

南塘泛舟會元六昆季

韋應物

端居倦時燠輕舟泛廻塘微風飄襟散橫吹繞林長雲
淡水容夕雨微荷氣涼一寫悵勤意寧用訴華觴

引極

元結

天曠漭兮杳泱泱氣浩浩兮色蒼蒼上何有兮人不測
積清寥兮成元極成元極兮靈且異思一見兮藐難致
思不從兮空自傷心慙勞兮意惶懷思假翼兮鸞鳳乘
長風兮上翔揖元極兮本泱實餐至和兮永終日

將歸操

韓愈

秋之水兮其色幽幽我將濟兮不得其由涉其淺兮石
齧我足乘其淩兮龍入我舟我濟而悔兮將安歸尤歸
兮歸兮無與石鬪兮無應龍求

猗蘭操

蘭之猗猗揚揚其香不採而佩於蘭何傷今天之旋其
易爲然我行四方以日以年雪霜貿貿音茂齊麥之茂子
如不傷我不爾觀齊麥之茂齊麥之有君子之傷君子
之守

龜山操

龜之氛兮不能雲雨龜之枿

牙葛切

兮不中梁柱龜之大

兮祇以奄魯知將墮兮哀莫余伍周公有鬼兮嗟余歸

輔

越裳操

雨之施物以孳我何意於彼爲自周之先其艱其勤以
有疆宇私我後人我祖在上四方在下厥臨孔威敢戲
以侮孰荒於門孰治於田四海旣均越裳是臣

折檻行

杜甫

相倫

卷之二

嗚呼汾魏不復見秦王學士時難羨青衿胄子困泥塗
白馬將軍若雷電千載少似朱雲人至今折檻空嶙峋
要公不語宋公語尚憶先皇容直臣

莫相疑行

男兒生無所成頭皓白牙齒欲落真可惜憶獻三賦蓬
萊宮自怪一日聲輝赫集賢學士如堵牆觀我落筆中
書堂往時文彩動人主此日飢寒趨路旁晚將末契托
年少當面輸心背面笑寄謝悠悠世上兒不爭好惡莫
相疑

蜀道難

李白

噫吁戲危乎高哉蜀道之難難於上青天
鷲叢及魚鳧開國何茫然爾來四萬八千歲
不與秦塞通人煙西當太白有鳥道可以橫
絕峨眉巔地崩山摧壯士死然後天梯石棧
相鉤連上有六龍回日之高標下有衝波逆
折之回川黃鶴之飛尚不得過猿猱欲度愁
攀援青泥何盤盤百步九折縈巖巒捫參歷
井仰脅息以手撫膺坐長歎問君西遊何時
還畏途巖巖不可攀但見悲鳥號古木雄飛
從雌繞林間又聞子規啼夜月愁空山蜀

道之難難於上青天使人聽此凋朱顏連峰去天不盈
尺枯松倒掛倚絕壁飛湍瀑流爭喧豗砅厓轉石萬壑
雷其險也如此嗟爾遠道之人胡爲乎來哉劍閣崢嶸
而崔嵬一夫當關萬夫莫開所守或匪親化爲狼與豺
朝避猛虎夕避長蛇磨牙吮血殺人如麻錦城雖云樂
不如早還家蜀道之難難於上青天側身西望長谷嗟
鳴皋歌送岑徵君

若有人兮思鳴皋阻積雪兮心煩勞洪河凌兢不可以
徑度冰龍鱗兮難容舸邈仙山之峻極兮聞天籟之嘈

嘈霜厓縞皓以合沓兮若長風扇海湧滄溟之波濤立
猿綠熊舔談崑崙危柯振石駭膽慄魄羣呼而相號峰
崢嶸以路絕挂星辰於巖敷送君之歸兮動鳴皋之新
作交鼓吹兮彈絲觴清泠之池閣君不行兮何待若反
顧之黃鶴掃梁園之羣英振大雅於東洛巾征軒兮歷
阻折尋幽居兮越巘粵盤白石兮坐素月琴松風兮寂
然聲聲不見兮心氛氲蘿冥冥兮霞紛紛水橫洞以下
淙波小聲而上聞虎嘯谷而生風龍藏溪而吐雲寡鶴
清唳饑腸嘖呻魂獨處此幽默兮愀空山而愁人雞聚

魚以爭食鳳孤飛而無隣
螻蛄嘲龍魚目混珍
嫫母衣錦西施負薪
若使巢由桎梏於軒冕
今亦奚異乎
夔龍蹶躅於風塵
哭何苦而救楚笑何誇
而卻秦
吾誠不能學二子
沽名矯節以耀世
今固將棄天地而遺身
白鷗
今飛來長與君
今相親

古意

陳子昂

日雲蒼梧來氛氲萬里色
聞君太平代栖泊靈臺側

尋菊花潭主人

孟浩然

行至菊花潭村西日已斜
主人登高去雞犬空在家

終南望餘雲

祖詠

終南陰嶺秀積雪浮雲端林表明霽色城中增暮寒

登廬山五老峰

李白

廬山東南五老峰青天削出金芙蓉九江秀色可攬結
吾將此地巢雲松

別盈上人

韓愈

山僧愛山出無期俗士牽俗來何時祝融峰下一迴首
卽是此生長別離

宴陳十六樓

祖詠

西樓對金谷此地古人心白日落庭內黃花生澗陰四
隣見疎木萬井度寒砧石上題詩處千年畱至今

秦州雜詩二十首

杜甫

滿目悲生事因人作遠遊遲迴度隴怯浩蕩及關愁水
落魚龍夜山空鳥鼠秋西征問烽火心折此淹畱
秦州城北寺傳是隗囂宮苔蘚山門古丹青野殿空月
明垂葉露雲逐度溪風清渭無情極愁時獨向東
州圖領同谷驛道出流沙降虜兼千帳居人有萬家馬
驕朱汗落胡舞白題斜年少臨洮子西來亦自誇

鼓角緣邊郡川原欲夜時秋聽殷地發風散入雲悲抱
葉寒蟬靜歸山鳥獨遲萬方聲一槩吾道竟何之

南使宜天馬由來萬匹強浮雲連陣沒秋草徧山長聞
說真龍種仍殘老驕驕哀鳴思戰鬪廻立向蒼蒼

城上胡笳奏山邊漢節歸防河赴滄海奉詔發金微士
苦形骸黑林疎鳥獸稀那堪往來戍恨解鄴城圍

莽莽萬重山孤城山谷間無風雲出塞不夜月臨關屬
國歸何晚樓蘭斬未還煙塵一長望衰颯正摧顏

聞道尋源使從天此路回牽牛去幾許宛馬至今來一

望幽燕隔何時郡國開東征健兒盡羌笛暮吹哀

今日明人眼臨池好驛亭叢篁低地碧高柳半天青稠
煙多幽事喧呼閱使星老夫如有此不異在郊坰

雲氣接崑崙涔涔塞雨繁羌童看渭水使客向河源煙
火軍中幕牛羊嶺上村所居秋草靜正閉小蓬門

蕭蕭古塞冷漠漠秋雲低黃鵠翅垂雨蒼鷹饑啄泥蒨
門誰自北漢將獨征西不意書生耳臨衰厭鼓鞞

山頭南郭寺水號北流泉老樹空庭得清渠一邑傳秋

花危石底晚景臥鍾邊俛仰悲身世溪風爲颯然

傳道東柯谷深藏數十家對門藤蓋瓦映竹水穿沙瘦
地翻宜粟陽坡可種瓜船人相近報但恐失桃花

萬古仇池穴潛通小有天神魚久不見福地語真傳近
接西南境長懷十九泉何時一茅屋送老白雲邊

未暇泛滄海悠悠兵馬間塞門風落木客舍雨連山阮
籍行多興龐公隱不還東柯遂疎懶休鑷鬢毛斑

東柯好崖谷不與衆峰羣落日邀雙鳥晴天卷片雲野
人吟險絕水竹會平分採藥吾將老童兒未遣聞

邊秋陰易夕不復辯晨光簷雨亂淋幔山雲低度墻鷓

銀漢井蚯蚓上淡堂車馬何蕭索門前百草長
地僻秋將盡山高客未歸塞雲多斷續邊日少光輝警
急烽常報傳階檄屢飛西戎外甥國何得近天威
鳳林戈未息魚海路常難埃火雲峰峻懸軍幕井乾風
連西極動月過北庭寒故老思飛將何時議築壇

唐堯真自聖野老復何知曬藥能無婦應門亦有兒藏
書聞禹穴讀記憶仇池爲報駕行舊鷦鷯在一枝

鄭駙馬宅宴洞中

杜甫

主家陰洞細煙霧畱客夏簟青琅玕春酒杯濃琥珀薄

冰漿枕碧瑪瑙寒悞疑茅堂過江麓已入風磴靈雲端
自是秦樓壓鄭谷時聞環珮聲珊珊

題省中院壁

披垣竹埤梧十尋洞門對雪長陰陰落花游絲白日靜
鳴鳩乳燕青春淡腐儒衰晚謬通籍退食遲回違寸心
衮職曾無一字補許身愧比雙南金

寓居澧上精舍寄于張二舍人 韋應物

萬木葉雲出香閣西連碧澗竹林園高齋獨宿遠山曙
微霰下庭寒雀喧道心淡泊對流水生事蕭條空掩門

列傳

卷之二十一

古

時憶故交那可得曉排闥圖舉明恩

典雅

典者用古無痕雅者出辭有度博瞻而卻橫筋露骨只謂之編事而不謂之典樸茂而無靈脫渾化只謂之凝重而不謂之雅典而雅甚難也

奉和聖製登蒲州逍遙樓

蘇頌

在昔堯舜禹遺塵成典謨聖皇東巡狩况乃經此都樓觀紛迤邐山河幾縈紆緬懷祖宗業相繼文武圖尚德既無險觀風諒有孚豈知汾水上簫鼓事遊娛

行次昭陵

杜甫

舊俗疲庸主羣雄問獨夫
識歸龍鳳質威定虎狼都
天屬尊堯典神功協禹謨
風雲隨絕足日月繼高衢
文物多師古朝廷半老儒
直辭寧戮辱賢路不崎嶇
往者災猶降蒼生喘未蘇
拊揮安率土盪滌撫洪鑪
壯士悲陵邑幽人拜鼎湖
玉衣晨自舉鐵馬汗常趨
松柏瞻虛殿塵沙立暝途
寂寥開國日流恨滿山隅

宣城送劉副使入秦

李白

君卽劉越石雄豪冠當時
淒清橫吹曲慷慨扶風辭
虎嘯俟騰躍雞鳴遭亂離
千金市駿馬萬里逐王師
結交

樓煩將待從羽林兒統兵捍吳越豺虎不敢窺大勲竟
莫敘已過秋風吹秉鉞有季公凜然負英姿寄溪且戎
幕望重必台司感激一然諾縱橫兩無疑伏奏歸北關
鳴騶忽西馳列將咸出祖英寮惜分離斗酒滿四筵歌
嘯宛溪湄君攜東山妓我詠北門詩貴賤交不易恐傷
中園葵昔贈紫騮駒今傾白玉卮同歡萬斛酒未足解
相思此別又千里秦吳渺天涯月明關山苦水劇隴頭
悲借問幾時還春風入黃池無令長相思折斷綠楊枝

龍門應制

宋之問

宿雨霽氣埃流雲度城闕河堤柳新翠苑樹花先發洛陽花柳此時濃山水樓臺映幾重羣公拂霧朝翔鳳天子乘春幸鑿龍鑿龍近出王城外羽從淋漓擁軒蓋雲蹕纔臨御水橋天衣已入香山會山壁巖巖斷復連清流潒微俯伊川塔影遙遙綠川上星龕奕奕翠微邊層巒舊長千尋木遠壑初飛萬丈泉綵仗紅旌繞香閣下輦登高望河洛東城宮闕擬昭回南陌溝塍珠綺錯林下天香七寶臺山中有酒萬年杯微風一起祥花落仙樂初鳴瑞鳥來鳥來花落紛無已稱觴獻壽香霞裏歌

舞沔畱景欲斜石間猶駐五雲車
鳥旗奕奕畱芳草龍騎駿駿映晚花
千乘萬騎鸞輿出水靜山空嚴警蹕郊
外喧喧引看人傾都南望屬車塵囂聲
引颺聞黃道王氣周回入紫宸
先王定鼎山河固寶命乘周萬物新
吾君不事瑤池樂時雨來觀農扈春

汾陰行

李嶠

君不見昔日西京全盛時
汾陰后土親祭祠
齋宮宿寢設廚供
撞鐘鳴鼓樹羽旂
漢家四葉才且雄
賓筵萬靈服
九戎栢梁賦詩高
宴罷詔書法駕幸
河東河東太守

親掃除奉迎至尊導鑾輿五營將校列容衛三河縱觀
空閭里回旌駐蹕降靈場焚香尊醕邀百祥金鼎發食
正焜煌靈祇燁燁攄景光埋玉陳牲禮神畢舉麾上馬
乘輿出彼汾之曲嘉可遊杏蘭爲楫桂爲舟棹歌微吟
綵鷁浮簫鼓哀鳴白雲秋歡娛宴洽賜羣后家家復除
尸牛酒聲名動天樂無有千秋萬歲南山壽自從天子
向秦關玉輦金輿不復還珠簾羽帳長寂寞鼎湖龍髯
安可攀千齡人事一朝空四海爲家此路窮雄豪意氣
今何在壇場宮館盡蒿蓬路逢故老長歎息世事回還

不可測昔時青樓對歌舞今日黃埃聚荆棘山川滿目
淚沾衣富貴榮華能幾時不見只今汾水上唯有年年
秋鴈飛

石鼓歌

韓愈

張生手持石鼓文勸我試作石鼓歌少陵無人謫僊死
才薄將奈石鼓何周綱陵遲四海沸宣王憤起揮天戈
大開明堂受朝賀諸侯劍珮鳴相磨蒐於岐陽騁雄俊
萬里禽獸皆遮羅鐫功勒成告萬世鑿石作鼓隳嵯峨
從臣才藝咸第一揀選撰刻畱山阿雨淋日炙野火燎

鬼物守護煩搗呵公從何處得紙本毫髮盡備無差訛
辭嚴義密讀難曉字體不類隸與蚪年深豈免有缺畫
快劍所斷生蛟螭鸞翔鳳翥衆僊下珊瑚碧樹交枝柯
金繩鐵索鎖鈕壯古鼎躍水龍騰梭陋儒編詩不收入
二雅褊迫無委蛇孔子西行不到秦倚撫星宿遺羲娥
嗟予好古生苦晚對此涕淚雙滂沱憶昔初蒙博士徵
其年始改稱元和故人從軍在右輔爲我量度掘曰科
濯冠沐浴告祭酒如此至寶存豈多瓊包席裏可立致
十鼓祇載數駱駝薦諸太廟比郛鼎光價豈止百倍過

聖恩若許畱太學諸生講解得切磋觀經鴻都尚填咽
坐見舉國來奔波剡苔剔薜露節角安置妥帖平不頗
大廈波簷與蓋覆經歷久遠期無佗中朝大官老於事
詎肯感激徒媵嬰牧童敲火牛礪角誰復著手爲摩挲
日消月鑠就埋沒六年西顧空吟哦羲之俗書趁姿媚
數紙尚可博白鵝繼周八代爭戰罷無人收拾理則那
方今太平日無事柄任儒術崇丘軻安能以此上論列
願借辯口如懸河石鼓之歌止於此嗚呼吾意其蹉跎

中書寓直詠雨

楊師道

雲暗蒼龍闕沉沉殊未開
牕臨鳳皇沼颯颯雨聲來

早發韶州

宋之問

綠樹秦京道青雲洛水橋
故園長在目魂去不須招

八陣圖

杜甫

功蓋三分國名成八陣圖
江流石不轉遺恨失吞吳

十五夜御前踏歌行

張說

華萼樓前雨露新長安城裏太平人
龍銜火樹千燈豔雞上蓮花萬歲春

尋道觀

王勃

芝廬光分閬苑闕盛規模碧壇清桂闕丹洞肅松樞玉
笈三山記金箱五岳圖蒼虬不可得空望白雲衢

恩敕麗正殿書院賜宴應制

張說

東璧圖書府西園翰墨林誦詩聞國政講易見天心位
竊和羹重恩叨醉酒深載歌春興曲情竭爲知音

秋望

杜甫

身許麒麟畫年衰鴛鴦羣大江秋易盛空峽夜多聞逕
隱千重石帆留一片雲兒童解蠻語不必作參軍

上韋左相二十韻

杜甫

鳳曆軒轅紀龍飛四十春八荒開壽域一氣轉洪鈞霖
雨思賢佐丹青憶老臣應圖求駿馬驚代得騏驎沙汰
江河濁調和鼎鼐新韋賢初相漢范叔已歸秦盛業今
如此傳經固絕倫豫樟淦出地滄海濶無津北斗司喉
舌東方領搢紳持衡畱藻鑒聽履上星辰獨步才超古
餘波德照隣聰明過管輅尺牘倒陳遵豈是池中物由
來席上珍廟堂知至理風俗盡還淳才傑俱登用愚蒙
但隱淪長卿多病久子夏索居貧回首驅流俗生涯似
衆人巫咸不可問鄒魯莫容身感激時將晚蒼茫興有

神爲公歌此曲涕淚在衣巾

和太常韋主簿五郎溫泉寓目 王維

漢主離宮接露臺秦川一半夕陽開青山盡是朱旗繞
碧澗翻從玉殿來新豐樹裏行人度小苑城邊獵騎回
聞道甘泉能獻賦懸知獨有子雲才

奉送蜀州柏二別駕將中丞命赴江陵起居衛
尚書太夫人因示從弟行軍司馬位 杜甫

中丞問俗畫熊頻愛弟傳書綵鷁新遷轉五州防禦使
起居八座太夫人楚宮臘送荆門水白帝雲偷碧海春

與報惠連詩不惜知吾斑鬢總如銀

晉公破賊回重拜台司以詩示幕賓客愈奉和

韓愈

南伐旋師太華東天書夜到冊元功將軍舊歷三司貴
相國新兼五等崇鴛鴦欲歸僊仗裏熊羆還入禁營中
長慚典午非材職得就閒官卽至公

雄渾

雄者項王以八千人破秦軍十萬渾者郭令公未常有
驕色雄者其氣不可屈抑渾者其美不徒字句雄而不
渾易流於麓放渾而不雄多人於沉滯

薊丘覽古贈盧居士藏用六首 陳子昂

北登薊丘望求古軒轅臺應龍已不見牧馬生黃埃尚
想廣成子遺跡白雲隈

右軒轅臺

南登碣石館遙望黃金臺丘陵盡喬木昭王安在哉霸
圖悵已矣驅馬復歸來

右燕昭王

王道已淪昧戰國競貪兵樂生何感激仗義下齊城雄
圖竟中天遺歎寄阿衡

右樂生

秦王日無道太子怨亦深一聞田光義匕首贈千金其
事雖不立千載爲傷心

右燕太子

自古皆有死殉義良獨希奈何燕太子尚使田生疑伏
劍誠已矣感我涕沾衣

右田光先生

大運淪三代天人罕有窺鄒子何遽廓謾說九瀛垂典
已千載今也則無推

右鄒子

後出塞五首

杜甫

男兒生世間及壯當封侯戰伐有功業焉能守舊丘召
募赴薊門軍動不可留千金買馬鞍百金裝刀頭閭里
送我行親戚擁道周班白居上列酒酣進席羞少年別
有贈含笑看吳鉤

朝進東門營暮上河陽橋落日照大旗馬鳴風蕭蕭平
沙列萬幕部伍各見招中天懸明月令嚴夜寂寥悲
笳數聲動壯士慘不驕借問大將誰恐是霍嫖姚

古人重守邊今人重高勲豈知英雄主出師亘長雲六
合已一家四夷且孤軍遂使貔虎士奮身勇所聞拔劍

雅倫

卷之二十

五

擊大荒日收胡馬羣誓開玄冥北持以奉吾君

獻凱日繼踵兩蕃靜無虞漁陽豪俠地擊鼓吹笙竽雲
帆轉遼海稊稻來東吳越羅與楚練照耀輿臺軀主將
位益崇氣驕凌上都邊人不敢議議者死通衢

我本良家子出師亦多門將驕益愁思身貴不足論躍
馬二十年恐辜明主恩坐見幽州騎長驅河洛昏中夜
間道歸故里但空村惡名幸脫免窮老無兒孫

經亂離後天恩流夜郎憶舊遊書懷贈江夏韋

太守良宰

李白

天上白玉京十二樓五城僊人撫我頂結髮受長生誤
逐世間樂頗窮理亂情九十六聖君浮雲掛空名天地
賭一擲未能忘戰爭試涉霸王略將期軒冕榮時命乃
大謬棄之海上行學劍翻自哂爲文竟何成劍非萬人
敵文竊四海聲兒戲不足道五噫出西京臨當欲去時
慷慨淚沾纓歎君倜儻才標舉冠羣英開筵引祖帳慰
此遠徂征鞍馬若浮雲送余驃騎亭歌鍾不盡意白日
落昆明十月到幽州戈鋌若羅星君王棄北海掃地借
長鯨呼吸走百川燕然可推傾心知不得語卻欲棲蓬

瀛海孤懼天狼挾矢不敢張攬涕黃金臺呼天哭昭王
無人貴駿骨綠耳空騰驤樂毅儻再生于今亦奔亡蹉
跎不得意驅馬還貴鄉逢君聽絃歌肅穆坐華堂百里
獨太古陶然臥羲皇徵樂昌樂館開筵列壺觴賢豪間
青娥對燭儼成行醉舞紛綺席清歌繞飛梁歡娛未終
朝秩滿歸咸陽祖道擁萬人供帳遙相望一別隔千里
榮枯異炎涼炎涼幾度改九土中橫潰漢甲連胡兵沙
塵暗雲海草木搖殺氣星辰無光彩白骨成丘山蒼生
竟何罪幽關壯帝居國命懸哥舒長戟三十萬開門納

克渠公卿如犬羊忠讜醢與菹二聖出遊豫兩京遂丘
墟帝子許專征秉旄控强楚節制非桓文軍師擁熊虎
人心失去就賊勢勝風雨惟君固房陵誠節冠終古僕
臥香爐頂餐霞漱瑤泉門開九江轉枕下五湖連半夜
水軍來尋陽滿旌旄空名適自誤迫脅上樓船徒賜五
百金棄之若浮煙辭官不受賞翻謫夜郎天夜郎萬里
道西上令人老掃蕩六合清仍爲負霜草日月無偏照
何由訴蒼昊良牧稱神明潑仁恤交道一忝青雲客三
登黃鶴樓顧慙禍處士虛對鸚鵡州樊山霸氣盡寥落

天地秋江帶峨眉雪川橫三峽流萬舸此中來連帆過
揚州送此萬里目曠然散我愁紗窗倚天開水樹綠如
髮窺日畏銜山促酒喜得月吳娃與越豔窈窕誇鉛紅
呼來上雲梯含笑出簾櫳對客小垂手羅衣舞春風賓
跪請休息主人情未極覽君荆山作江鮑堪動色清水
出芙蓉天然去雕飾逸興橫素襟無時不招尋朱門擁
虎士列戟何森森剪鑿竹石開滌流漲清濤登樓坐水
閣吐論多英音片辭貴白璧一諾輕黃金謂我不愧君
青鳥問丹心五色雲間鵲飛鳴天上來傳聞赦書至卻

放夜郎迴暖氣變寒谷炎煙生死灰君登鳳池去忽棄
賈生才桀犬尚吠堯匈奴笑千秋中夜四五歎常爲大
國憂旌旆夾兩山黃河當中流連雞不得進飲馬空夷
猶安得羿善射一箭落旄頭

行路難

李白

金尊清酒斗十千玉盤珍羞直萬錢停盃投筯不能食
拔劍四顧心茫然欲渡黃河水塞川將登太行雪滿山
閑來垂釣碧溪上忽復乘舟夢日邊行路難行路難多
岐路今安在長風破浪會有時直挂雲帆濟滄海

魏將軍歌

杜甫

將軍昔著從事衫，鐵馬馳突重兩銜。
被堅執銳略西極，崑崙月窟東嶄巖。
君門羽林萬猛士，惡若哮虎子所監。
五年起家列霜戟，一日過海收風帆。
平生流輩徒蠢蠢，長安少年氣欲盡。
魏侯骨聳精爽緊，華嶽峰尖見秋隼。
星纏寶校金盤陀，夜騎天駟超天河。
攙槍熒惑不敢動，翠裝雲旂相蕩摩。
吾爲子起歌，護酒闌插劍肝膽露。
鈎陳蒼蒼風立武，萬歲千秋奉明主。
臨江節士安足數。

哀江頭

杜甫

少陵野老吞聲哭春日潛行曲江曲江頭宮殿瑣千門
細柳新蒲爲誰綠憶昔霓旌下南苑苑中萬物生顏色
昭陽殿裏第一人同輦隨君侍君側輦前才人帶弓箭
白馬嚼齧黃金勒翻身向天仰射雲一箭正墮雙飛翼
明眸皓齒今何在血污游魂歸不得清渭東流劍閣深
去住彼此無消息人生有情淚沾臆江水江花豈終極
黃昏胡騎塵滿城欲往城南忘城北

洗兵馬

杜甫

中興諸將收山東捷書夜報清晝同河廣傳聞一輩過

胡危命在破竹中祇殘鄴城不日得獨任朔方無限功
京師皆騎汗血馬回紇餒肉蒲萄宮已喜皇威清海岱
常思仙仗過崆峒三年笛裏關山月萬國兵前草木風
成王功大心轉小郭相謀深古來少司徒清鑒懸明鏡
尚書氣與秋天杳二三豪俊爲時出整頓乾坤濟時了
東走無復憶鱸魚南飛覺有安巢鳥青春復隨冠冕入
紫禁正耐煙花繞鶴駕通宵鳳輦備雞鳴問寢龍樓曉
攀龍附鳳勢莫當天下盡化爲侯王汝等豈知蒙帝力
時來不得誇身強關中旣畱蕭丞相幕下復用張子房

張公一生江海客身長九尺鬚眉蒼微起適遇風雲會
扶顛始知籌策良青袍白馬竟何有後漢今周喜再昌
寸地尺天皆入貢奇祥異瑞爭來送不知何國致白環
復道諸山得銀甕隱士休歌紫芝曲辭人解撰河清頌
田家望望惜雨乾布穀處處催春種洪上健兒歸莫嬾
城南思婦愁多夢安得壯士挽天河淨洗甲兵長不用

夜送趙縱

楊一炯

趙氏連城壁由來天下傳送君還舊府明月滿前川

南樓望

盧僎

去國二巴遠登樓萬里春傷心江上客不是故鄉人

答武陵田太守

王昌齡

仗劍行千里微軀敢一言曾爲大梁客不負信陵恩

登鶴雀樓

王之渙

白日依山盡黃河入海流欲窮千里目更上一層樓

平蕃曲

劉長卿

絕漠大軍還平沙獨戍閑空留一片石萬古在燕山

瓜州送李端公

片帆何處去匹馬獨歸遲惆悵江南北青山欲暮時

涼州辭

王翰

蒲桃美酒夜光杯
欲飲琵琶馬上催
醉臥沙場君莫笑
古來征戰幾人回

從軍行

王昌齡

秦時明月漢時關
萬里長征人未還
但使龍城飛將在
不教胡馬度陰山

觀獵

角鷹初下秋草稀
鐵驄拋毬去如飛
少年獵得平原兔
馬上橫鞘意氣歸

雅倫

卷之二十

元

封大夫破播仙凱歌

岑參

漢將承恩西破戎捷書先奏未央宮
天子預開麟閣待
祇今誰數貳師功

被試出塞

沈佺期

十年通大漠萬里出長平
寒日生戈劍陰雲拂旆旌
饑烏啼舊壘疲馬戀空城
辛苦皋蘭北胡塵損漢兵

旅夜書懷

杜甫

細草微風岸危檣獨夜舟
星隨平野濶月湧大江流
名豈文章著官因老病休
飄飄何所似天地一沙鷗

雷

巫峽中宵動滄江十月雷龍蛇不成蟄天地劃爭迴卻
碾空山過溪蟠絕壁來何須妬雲雨霹靂楚王臺

朝

清旭楚宮南霜空萬嶺含野人時獨往雲木曉相參俊
鵲無聲過饑鳥下食貪病身終不動搖落任江潭

月夜憶舍弟

戍鼓斷人行邊秋一鴈聲露從今夜白月是故鄉明有
弟皆分散無家問死生寄書長不達况乃未休兵

中丞宋公以吳兵三千赴河南軍次潯陽脫余
之囚叅謀幕府因贈之

李 白

獨坐清天下專征出海隅九江皆渡虎三郡盡還珠組
練明秋浦樓船入郢都風高初選將月滿欲平胡殺氣
橫千里軍聲動九區白猿慙劍術黃石借兵符戎虜行
當剪鯨鯢立可誅自憐非劇孟何以佐良圖

秋興八首

杜 甫

玉露凋傷楓樹林巫山巫峽氣蕭森江間波浪兼天湧
塞上風雲接地陰叢菊兩開他日淚孤舟一繫故園心

寒衣處處催刀尺白帝城高急暮砧

夔府孤城落日斜每依南斗望京華聽猿實下三聲淚
奉使虛隨八月槎畫省香爐違伏枕山樓粉堞隱悲笳
請看石上藤蘿月已映洲前蘆荻花

千家山郭靜朝暉日日江樓坐翠微信宿渙人還汎汎
清秋鷺子故飛飛匡衡抗疏功名薄劉向傳經心事違
同學少年多不賤五陵衣馬自輕肥

聞道長安似奕碁百年世事不勝悲王侯第宅皆新主
文武衣冠異昔時直北關山金鼓振征西車馬羽書遲

魚龍寂寞秋江冷故國平居有所思

蓮葉宮闕對南山承露金莖霄漢間西望瑤池降王母
東來紫氣滿函關雲移雉尾開宮扇日繞龍鱗識聖顏
一臥滄江驚歲晚幾回青瑣點朝班

瞿唐峽口曲江頭萬里風煙接素秋花萼夾城通御氣
芙蓉小苑入邊愁珠簾繡柱圍黃鶴錦纜牙樯起白鷗
迴首可憐歌舞地秦中自古帝王州

昆明池水漢時功武帝旌旗在眼中織女機絲虛月夜
石鯨鱗甲動秋風波漂菰米沉雲黑露冷蓮房墜粉紅

關塞極天唯鳥道江湖滿地一漁翁

昆吾御宿自逶迤紫閣峰陰入漢陂香稻啄餘鸚鵡粒
碧梧棲老鳳皇枝佳人拾翠春相問僊侶同舟晚更移
綵筆昔曾干氣象白頭吟望苦低垂

深厚

魯國規模先秦冠服不露鋒鋷夷然安簡於
厚焉庶幾矣淡而不厚恐晦傲難通厚而不
少味

巫山高

張九齡

巫山與天近煙景常青熒此中楚王夢夢得神女靈神
女去已久雲雨空冥冥唯有巴猿嘯哀音不可聽

感遇

蘭蕊春葳蕤桂花秋皎潔欣欣此生意自以爲嘉節誰

知林棲者聞風坐見悅草木有本心何求美人折

鐵堂峽

杜甫

山風吹遊子縹緲乘險絕硤形藏堂隍壁色立積鐵徑
摩穹蒼蟠石與厚地裂修纖無限竹嵌空太始雪威遲
哀聲底徒旅慘不悅水寒長冰橫我馬骨正折生涯抵
弧矢盜賊殊未滅飄蓬踰三年迴首肝肺熱

萬丈潭

青溪合冥冥神物有顯晦龍依積水蟠窟壓萬丈內踟
步凌垠塢側身下煙靄前臨洪濤寬卻立蒼石大山危

一徑盡岸絕兩壁對削成根虛無倒影垂澹瀕黑如灣
潭底清見光炯碎孤雲倒來淡飛鳥不在外高蘿成帷
幄寒水壘旌旆遠川曲通流嵌竇潛洩瀨造幽無人境
發興自我輩告歸遺恨多將老斯遊最閑藏修鱗蟄出
入巨石礙何事炎天過快意風雨會

奉同郭給事湯東靈湫作

東山氣鴻濛宮殿居上頭君來必十月樹羽臨九州陰
火煮玉泉噴薄漲巖幽有時浴赤日光抱空中樓聞風
入微跡廣原延冥搜拂天萬乘動觀水百丈湫幽靈斯

可怪王命官屬休初聞龍用壯擘石摧林丘中夜窟宅
改移因風雨秋倒懸瑤池影屈注滄江流味如甘露漿
糝弄滑且柔翠旗淡偃蹇雲車紛少畱簫鼓蕩四冥異
香泐滌淨鮫人獻微綃曾祝沉豪牛百祥奔盛明古先
莫能儔坡陀金蝦蟆出見蓋有由至尊顧之笑王母不
遣收復歸虛無底化作長黃虬飄飄青瑣郎文采珊瑚
鉤浩歌綠水曲清絕聽者愁

明月

李如璧

三五月華流煙光可憐懷歸郢路長逾江越漢津無梁

遙遙永夜思茫茫昭君失寵辭上宮蛾眉彈娟臥氈穹
胡人琵琶彈北風漢家音信絕南鴻昭君此時怨畫工
可憐明月光腫臃節旣秋兮天向寒沅有漪兮湘有瀾
沅湘糾合淼漫漫洛陽才子憶長安可憐明月復團圓
逐臣戀主心愈恪棄妾思君情不薄已悲芳歲徒淪落
復恐紅顏坐銷鑠可憐明月方照灼向影傾身比葵藿

驄馬行

杜甫

鄧公馬癖人共知初得花驄大宛種夙昔傳聞思一見
牽來左右神皆竦雄姿逸態何嶄崒顧影驕嘶目矜寵

限目青瑩夾鏡懸肉駿礪礪連錢動朝來少試華軒下
未覺千金滿高價赤汗微生白雪毛銀鞍卻覆香羅帕
卿家舊物公能取天廐真龍此其亞晝洗須騰涇渭淡
夕趨可刷幽并夜吾聞良驥老始成此馬數年人更驚
豈有四蹄疾於鳥不與八駿俱先鳴時俗造次那得致
雲霧晦冥方降精近聞下詔喧都邑肯使麒麟地上行

送李睢陽

王維

將置酒思悲翁使君去出城東麥漸漸雉子班槐陰陰
到潼關騎連連車遲遲心中悲宋又遠周門之南淮夷

東齊兒碎碎織練與素絲遊人賈客信難持五穀前熟
方可爲下車閉閤君當思天子當殿儼衣裳大官尚食
陳羽觴彤庭散綬垂明璫黃紙詔書出東廂輕紉疊綺
爛生光宗室子弟君最賢分憂當爲百辟先布衣一言
相爲死何況聖主恩如天鸞聲噦噦魯侯旗明年上計
朝京師須憶今日斗酒別慎勿富貴忘我爲

蟬

虞世南

垂綬飲清露流響出疎桐居高聲自遠非是籍秋風

玉階怨

李白

玉階生白露夜久侵羅襪卻下水晶簾玲瓏望秋月

江亭月夜送別

王勃

亂煙籠碧砌飛月向南端寂寂離亭掩江山此夜寒

古調

劉禹錫

軒后初冠冕前旒爲蔽明安知從複道然後見人情

江行夜詠

權德輿

猿聲到枕上愁夢紛難理寂寂淡夜寒清霜落秋水

蕪城懷古

李端

風吹城上樹草沒城邊路城裏月明時精氣自來去

上皇西巡南京歌

李白

劍閣重關蜀北門
上皇歸馬若雲屯
少帝長安開紫極
雙懸日月照乾坤

望天門山

天門中斷楚江開
碧水東流至北迴
兩岸青山相對出
孤帆一片日邊來

早春與張十八博士籍遊楊尚書林亭寄弟三
閣老兼呈白馮二閣老

韓愈

牆下春渠入禁溝
渠水初破滿渠浮
鳳池近日長先暖

流到池時更不流

聽鄰家吹笙

郎士元

風吹聲如隔綵霞不知牆外是誰家
重門深鎖無尋處唯有碧挑千樹花

送臨津房少府

楊炯

岐路三秋別江津萬里長煙霞駐征蓋
絃奏促飛觴階樹含斜日池風之早涼
贈言未終竟流涕忽沾裳

杭州送裴大澤時赴廬州長史 李白

西江天柱遠東越海門濺去割慈親戀
行憂報國心好

風吹落日流水引長吟五月披裘者應知不取金

郊園卽事

王勃

煙霞春早賞松竹故年心斷山疑畫障縣瀟瀟鳴琴草
徧南亭合花開北院濺閒居饒酒賦隨興欲抽簪

宴越府陳法曹西亭

孫逖

公府西岩下紅亭間白雲雪梅初度臘煙竹稍迎曉水
木涵澄景簾櫳引霽氛江南歸思逼春雁不堪聞

大酺

杜審言

毘陵震澤九州通士女歡娛萬國同伐鼓撞鐘驚海上

雅倫

卷之二

天

新粧袷服照江東
梅花落處疑殘雪
柳葉開時任好風
火德雲官逢道泰
天長地久屬年豐

返照

杜甫

楚王宮北正黃昏
白帝城西過雨痕
返照入江翻石壁
歸雲擁樹失山村
支年肺病唯高枕
絕塞愁時早閉門

不可久畱豺虎亂南方實有未招魂

題張氏隱居

江甫

泰山無伴獨相求
伐木丁丁山更幽
澗道餘寒歷冰雪
石門斜日到林丘
不貪夜識金銀氣
遠害朝看麋鹿遊
乘興杳然迷出處
對君疑是泛虛舟

高老

獨踞萬仞高不可攀氣橫九州老境無敵然如蒼松翠
柏中含生新之色始稱上乘若枯枝斷梗則非所貴矣
飲馬渡秋水水寒風似刀平沙日未沒黯黯見臨洮昔
日長城戰威言意氣高黃塵是今古白骨亂蓬蒿

自京赴奉先縣詠懷

杜陵有布衣老大意轉拙許身一何愚竊比稷與契居
然成濩落白首甘契濶蓋棺事則已此志常覲豁窮年

塞上曲

王昌齡

曼黎元歎息腸內熱取笑同學翁浩歌彌激烈非無江
海志瀟灑送日月生逢堯舜君不忍便永訣當今廊廟
具溝廈豈云缺葵藿頃太陽物性固莫奪顧惟螻蟻輩
但自求其穴胡爲慕大鯨輒擬偃溟渤以茲悟生理獨
恥事干謁兀兀遂至今忍爲塵埃沒終愧巢與由未能
易其節沈飲聊自遣放歌頗愁絕歲莫百草零疾風高
岡裂天衢陰崢嶸客子中夜發霜嚴衣帶斷指直不得
結凌晨過驪山御榻在嵒嶠蚩尤塞寒空蹴踏崖谷滑
瑤池氣鬱律羽林相摩戛君臣留歡娛樂動殷膠葛賜

浴皆長纓與燕非短褐彤庭所分帛本自寒女出鞮鞢
其夫家聚歛貢城闕聖人筐篚恩實欲邦國活臣如忽
至理君豈棄此物多士盈朝廷仁者宜戰慄况聞內金
盤盡在衛霍室中堂舞神仙烟霧濛玉質煖客貂鼠裘
悲管逐清瑟勸客馳蹄羹霜橙壓香橘朱門酒肉臭路
有凍死骨榮枯咫尺異惆悵難再述北轅就涇渭官渡
又改轍羣水從西下極目高翠兀疑是崆峒來恐觸天
柱折河梁幸未圯支撐聲窸窣行旅相攀援川廣不可
越老妻既異縣十口隔風雪誰能久不顧庶往共饑渴

人門聞號咷幼子饑已卒吾寧捨一哀里巷一鳴咽所
愧爲人父無食致天折豈知秋未登貧屢有倉卒生常
完租稅名不隸征代撫跡猶酸辛平人固騷屑默思失
業徒因念遠戍卒憂端齊終南瀕洞不可掇

古風二首

李白

客有鶴上仙飛飛凌太清揚言碧雲裏自道安期名兩
兩白玉童雙吹紫鸞笙去影忽不見回風送天聲舉首
遠望之飄然若流星願餐金光草壽與天齊傾

天津三月時千門桃與李朝爲斷腸花莫逐東流水前

水復後水古今相續流
新人非舊人年年橋上游
雞鳴海色動調帝羅公
侯月落西上陽餘輝半
城樓衣冠照雲日朝下
散皇州鞍馬如飛龍黃
金絡馬頭行人皆辟易
志氣橫嵩丘入門上高
堂列鼎錯珍羞香風引
趙舞清管隨齊謳七十
紫鴛鴦雙雙戲庭幽行
樂爭晝夜自言度千秋
功成身不退自古多愆
尤黃犬空太息綠珠成
釁讎何如鴟夷子散髮
掉扁舟

南山詩

韓愈

吾聞京城南茲維羣山
圍東西兩際海巨細難
悉究山

經及地志茫昧非受授團辭試提挈挂一念萬漏欲休
諒不能粗敘所經觀嘗昇崇丘望戢戢見相湊晴明出
稜角縷脉碎分繡蒸嵐相潏洞表裏忽通透無風自飄
簸融液煦柔茂橫雲時平疑點點露數岫天空浮修眉
濃綠畫新就孤撐有巉絕海浴褰鵬噉春陰潏沚瀦瀦
濯吐深秀巖巒惟聳翠輭弱類含酎夏炎百木盛蔭鬱
增埤覆神靈日歆歆雲氣爭結構秋霜喜刻轢磔卓立
癯瘦參差相疊重剛耿陵宇宙冬行雖幽墨水雪工琢
鏤新曦照危峨億丈恒高袤明昏無停態頃刻異狀候

西南雄太白突起莫間簞藩都配德運分宅占丁戊逍
遙越坤位詆訐陷乾竇空虛寒兢兢風氣較搜漱朱維
方燒日陰霰縱騰糅昆明大池北去覲偶晴晝絲聯窮
俯視倒側困清漚微瀾動水面踴躍躁獐狖驚呼惜破
碎仰喜呀不仆前尋徑杜墅盆蔽畢原陋崎嶇上軒昂
始得觀覽富行行將遂窮嶺陸煩互走勃然思圻裂擁
掩難恕宥巨靈與夸蛾遠賈期必售還疑造物意固護
蓄精祐力雖能排幹雷電怯呵詬攀緣脫手足踴躍抵
積甃茫如試矯首塌塞生恂愁威容喪蕭爽近新逆遠

舊拘官計日月欲進不可又因緣窺其湫凝湛閼陰罟
魚蝦可俯掇神物安敢寇林柯有脫葉欲墮鳥驚救爭
銜彎環飛投棄急哺穀旋歸道廻睨達枿壯復奏吁嗟
信奇怪峙質能化質前年遭譴謫探歷得邂逅初從藍
田入顧眄勞頸脰時天晦大雪淚目苦朦朧峻塗拖長
冰直上若懸溜褰衣步推馬顛蹶退且復蒼黃忘遐睎
所臨纔左右杉篁咤蒲蘇杲耀攢介冑專心禱平道脫
險逾避臭昨來逢清霽宿願忻始剖崢嶸躋冢頂倏閃
離颺馳前低劃開闊爛漫堆衆皴或連若相從或蹙若

相鬪或妥若弭伏或竦若驚雉或散若瓦解或赴若輻
湊或翩若船遊或決若馬驟或背若相惡或向若相佑
或亂若抽筍或噪若注炎或錯若繪畫或繚若篆籀或
羅若星離或翳若雲逗或浮若波濤或碎若鋤耨或如
帝王尊叢集朝賤幼雖親不褻狎雖遠不悖謬或如臨
食案肴核紛飮餽又如遊九原墳墓包榔柩或纍若盆
罌或揭若甄豆或覆若曝鼈或頽若寢獸或蛻若藏龍
或翼若搏鶩或齊若友朋或隨若先後或迸若流落或
顧若宿留或戾若仇讐或密若婚媾或儼若峨冠或翻

若舞袖或屹若戰陣或圍若蒐狩或靡然東注或偃然
北首或如火熺焰或若氣饋餽或行而不輟或遺而不
收或斜而不倚或弛而不彀或赤若禿鬣或燠若柴樵
或如龜折兆或若封分繇或前橫若剝或後斷若妬延
延離又屬夫夫叛還遘喁喁魚闐萍落落月經宿閭閭
樹牆垣嘯嘯架庫廡參參削劒戟煥煥銜瑩琇敷敷花
披萼關闕屋摧霤悠悠舒而安兀兀狂以狙超超出猶
奔蠶蠶駭不懋大哉立天地經紀肖營腴厥初孰開張
俛俛誰勸侑創茲朴而巧戮力忍勞疚得非施斧斤無

乃假詛呪鴻荒竟無傳功大莫酬儼嘗聞於祠官芬苾
降歆嗅斐作歌詩惟用贊報酬

日出入行

李白

日出東方隈似從地底來歷天又入海六龍所舍安在
哉其始與終古不息人非元氣安得與之久徘徊草不
謝榮於春風木不怨落於秋天誰揮鞭策驅四運萬物
興歇皆自然羲和羲和汝奚汨沒於荒淫之波魯陽何
德駐景揮戈逆道違天矯誣實多吾將囊括大塊浩然
與溟滓同科

岳麓山道林二寺行

杜甫

玉泉之南麓山殊道林林壑爭盤紆寺門高開洞庭野
殿脚插入赤沙湖五月寒風冷佛骨六時天樂朝香爐
地靈步步雪山草僧寶人人滄海珠塔劫宮牆壯麗敵
香廚松道清涼俱蓮花交響共命鳥金榜雙迴三足鳥
方丈涉海費時節玄圃尋河知有無暮年且喜經行近
春日兼蒙暄暖扶飄然斑白身奚適旁此烟霞茅可誅
桃源人家易制度橘洲田土仍膏腴潭府邑中甚淳古
太守庭內不喧呼昔遭衰世皆晦迹今幸樂國養微軀

侯山老宿亦未晚富貴功名焉足圖久爲謝客尋幽慣
細學何顓臾興孤一重一掩吾肺腑山鳥山花吾友于
宋公放逐曾題壁物色分留與老夫

醉歌行

陸機二十作文賦汝更小年能綴文總角草書又神速
世上兒子徒紛紛驊騮作駒已汗血鸞鳥舉翮連青雲
詞源倒流三峽水筆陣獨掃千人軍只今年纔十六七
射策君門期第一舊穿楊葉真自知暫蹶霜蹄未爲失
偶然擢秀非難取會是非風有毛質汝身已見唾成珠

雅倫

卷二十

品復
哭

汝伯何由髮如漆春光淡迤秦東亭渚蒲牙白水荇青
風吹客衣日杲杲樹覺離思花冥冥酒盡沙頭雙玉餅
衆賓已醉我獨醒乃知貧賤別更苦吞聲躑躅涕泣零

城傍曲

王昌齡

秋風鳴桑條草白狐兔驕邯鄲飲來酒未消城北原平
掣皂鵬射殺空營兩騰虎迴身却月佩弓鞘

嗟哉董生行

韓愈

淮水出桐栢山東馳遙遙千里不能休淝水出其側不
能千里百里入淮流壽州屬縣有安豐唐貞元年時縣

人董生召南隱居行義於其中刺史不能薦天子不聞
名聲爵祿不及門門外唯有吏日來徵租更索錢嗟哉
董生朝出耕夜歸讀古人書盡日不得息或山而樵或
水而魚入廚具甘旨上堂問起居父母不憾憾妻子不
咨咨嗟哉董生孝且慈人不識惟有天翁知生祥下瑞
無時期家有狗乳出求食雞來哺其兒啄啄庭中拾蟲
蟻哺之不食鳴聲悲徬徨躑躅久不去以翼來覆待狗
歸嗟哉董生誰將與儔時之人夫妻相虐兄弟爲讐食
君之祿而令父母愁亦獨何心嗟哉董生誰將與儔

江南遇天寶樂叟歌

白居易

白頭病叟泣且言祿山未亂入梨園能彈琵琶和法曲
多在華清隨至尊是時天下太平久年年十月坐朝元
千官起居環珮合萬國會同車馬奔金細照耀石甕寺
蘭麝薰煮溫湯源貴妃宛轉侍君側體弱不勝珠翠繁
冬雪飄飄錦袍煖春風蕩漾霓裳翻歡娛未足燕寇至
弓勁馬肥胡語喧幽土人遷避夷狄鼎湖龍去哭軒轅
從此漂淪到南土萬人死盡一身存秋風江上浪無際
暮雨舟中酒一樽涸魚久失風波勢枯草曾沾雨露恩

我自秦來君莫問，驪山渭水如荒村。
新豐樹老籠明月，長生殿暗鎖黃昏。
紅葉紛紛蓋欹瓦，綠苔重重封壞垣。
唯有中官作宮使，每年寒食一開門。

送朱大入秦

孟浩然

游人五陵去，寶劍值千金。
分手脫相贈，平生一片心。

相逢行

李白

相逢紅塵內，高揖黃金鞭。
萬戶垂楊裏，君家阿那邊。

陪侍郎叔游洞庭

剡却君山好，平鋪湘水流。
巴陵無限酒，醉殺洞庭秋。

黃鶴樓送孟浩然之廣陵

李白

故人西辭黃鶴樓
烟花三月下揚州
孤帆遠影碧空盡
唯見長江天際流

出塞行

王昌齡

白茫茫原頭望京師
黃河水流無盡時
秋天曠野行人絕
馬首東來知是誰

送李侍郎赴常州

賈至

雪晴雲散北風寒
楚水吳山道路難
今日送君須盡醉
明朝相憶路漫漫

封大夫破播仙凱歌

岑參

漢將承恩西破戎，捷書先奏未央宮。
天子預開麟閣待，祇今誰數貳師功。

投贈哥舒開府翰二十韻

杜甫

今代麒麟閣，何人第一功。
君王自神武，駕馭必英雄。
開府當朝傑，論兵邁古風。
先鋒百勝在，略地兩隅空。
青海無傳箭，天山早挂弓。
廉頗仍走敵，魏絳已和戎。
每惜河湟棄，新兼節制通。
智謀垂睿想，出入冠諸公。
日月低秦樹，乾坤繞漢宮。
胡人愁逐北，宛馬又從東。
受命邊沙遠，

歸來御席同軒墀曾寵鶴畋獵舊非熊茅土加名數山
河誓始終策行遺戰伐契合動昭融勲業青冥上交親
氣槩中未爲珠履客已見白頭翁壯節初題柱生涯獨
轉蓬幾年春草歇今日暮途窮軍事留孫楚行間識已
蒙防身一長劍將欲倚崆峒

喜觀卽到復題短篇

巫峽千山暗終南萬里春病中吾見弟書到汝爲人竟
答兒童問來經戰伐新泊船悲喜後欸欸話歸秦

悲秋

涼風動萬里羣盜尙縱橫家遠傳書日秋來爲客情愁
窺高鳥過老逐衆人行始欲投三峽何由見兩京

客夜

客睡何曾著秋天不肯明入簾殘月影高枕遠江聲計
拙無衣食途窮仗友生老妻書數紙應悉未歸情

客亭

秋牕猶曙色木落更天風日出寒山外江流宿霧中聖
朝無棄物老病已成翁多少殘生事飄零任轉蓬

秋盡

秋盡東行且未迴茅齋寄在少城隈
籬邊老却陶潛菊江上徒逢袁紹杯
雪嶺獨看西日落劍門猶阻北人來
不辭萬里長爲客懷抱何時獨好開

野望

金華山北涪水西仲冬風日始淒淒
山連越嶺蟠三蜀水散巴渝下五谿
獨鶴不知何事舞饑鳥似欲向人啼
射洪春酒寒仍綠目極傷神誰爲攜

涪城縣香積寺官閣

寺下春江深不流山腰官閣迴添愁
含風翠壁孤雲細

背日丹楓萬木稠
小院回廊春寂寂
浴鳬飛鷺晚悠悠
諸天合在藤蘿外
昏黑應須到上頭

黃草峽

黃草峽西船不歸
赤甲山下行人稀
秦中驛使無消息
蜀道兵戈有是非
萬里秋風吹錦水
誰家別淚濕羅衣
莫愁劔閣終堪據
聞道松州已被圍

俊逸

鵲立雞羣別開一番毛羽仙來雲霧更具一段風神冉
冉欲飛悠悠自遠有神逸有氣逸有調逸有格逸句逸
音節逸不可以輕浮當之

古風八首

李白

蟾蜍薄太清餌此瑤臺月圓光虧中天金魄遂淪沒蟾
蜍入紫微大明夷朝暉浮雲隔兩曜萬象昏陰霏蕭蕭
長門宮昔是今已非桂蠹花不實天霜下嚴威沈嘆終
永夕感我涕沾衣

太白何蒼蒼星辰上森列去天三百里邈爾與世絕中
有綠髮翁披雲臥松雪不笑亦不語冥棲在巖穴我來
逢真人長跪問寶訣粲然啓玉齒授以鍊藥說銘骨傳
其語竦身已電滅仰望不可及蒼然五情熱吾將營丹
砂永與世人別

齊有僊儻生魯連特高妙明月出海底一朝開光曜却
秦振英聲後世仰末照意輕千金贈顧向平原笑吾亦
澹蕩人拂衣可同調

黃河走東溟白日落西海逝川與流光飄忽不相待春

容捨我去秋髮已衰改人生非寒松年貌豈長在吾當
乘雲螭吸景駐光彩

昔我遊齊都登華不注峯茲山何峻秀綠翠如芙蓉蕭
颯古仙人了知是赤松借予一白鹿自挾兩青龍含笑
陵倒景欣然願相從泣與親友別欲語再三咽勗君青
松心努力保霜雪世路多險艱白日欺紅顏分手各千
里去去何時還在世復幾時倏如飄風度空聞紫金經
白首愁相誤撫已忽自笑沉吟爲誰故名利徒煎熬安
得閒余步終留赤玉舄東上蓬萊路秦帝如我求蒼蒼

但烟霧

秋露白如玉團團下庭綠我行忽見之寒早悲歲促人
生鳥過日胡乃自結束景公一何愚牛山淚相續物苦
不知足得隴又望蜀人心若波瀾世路有屈曲三萬六
千日夜夜當秉燭

登高望四海天地何漫漫霜被羣物秋風飄大荒寒榮
華東流水萬事皆波瀾白日掩徂輝浮雲無定端梧桐
巢燕雀枳棘棲鸞鷟且復歸去來劍歌行路難

桃花開東園含笑誇日日偶蒙東風榮生此艷陽質豈

無佳人色但恐花不實宛轉龍火飛零落早相失詎知
南山松獨立自蕭颯

擬古五首

李白

高樓入青天下有白玉堂明月看欲墮當牕懸清光遙
夜一美人羅衣沾秋霜含情弄柔瑟彈作陌上桑絃聲
何激烈風卷遶飛梁行人皆躑躅棲鳥去迴翔但寫妾
意苦莫辭此曲傷願逢同心者飛作紫鴛鴦

長繩難繫日自古共悲辛黃金高北斗不傷買陽春石
火無留光還是世中人卽事已如夢後來我誰身提壺

莫辭貧取酒會四鄰仙人殊恍惚未若醉中真

今日風日好明日恐不如春風笑於人何乃愁自居吹
簫舞彩鳳酌醴餽神魚千金買一醉取樂不求餘達士
遺天地東門有二疏愚夫同瓦石有才知卷舒無事坐
悲苦塊然涸轍鮒

月色不可掃客愁不可道玉露生秋衣流螢飛百草日
月終銷毀天地同枯槁蟋蟀啼青松安見此樹老金丹
寧誤俗昧者難精討爾非千歲翁多恨去世早飲酒入
玉壺藏身以爲寶

涉江弄秋水愛此荷花鮮攀荷弄其珠蕩漾不成圓佳
期綵雲重欲贈隔遠天相思無由見悵望涼風前

寒食陸渾別業

宋之問

洛陽城裏花如雪陸渾山中花始發旦別河橋楊柳風
夕臥伊川桃李月伊川桃李正芳新寒食山中酒復春
野老不知堯舜力酣歌一曲太平人

送別

高適

昨夜離心正鬱陶三更白露西風高螢飛木落何淅瀝
此時夢見西歸客曙鐘寥亮三四聲東陵嘶馬使人驚

羽
攬衣出戶一相送惟見雲歸縱復橫

金陵酒肆留別

李白

風吹柳花滿店香吳姬壓酒勸客嘗金陵子弟來相送
欲行不行各盡觴請君試問東流水別意與之誰短長

扶風豪士歌

洛陽三月飛胡沙洛陽城中人怨嗟天津流水波赤血
白骨相撐如亂麻我亦東奔向吳國浮雲四塞道路賒
東方日出啼早鴉城門入開掃落花梧桐楊柳拂金井
來醉扶風豪士家扶風豪士天下奇意氣相傾山可移

作人不倚將軍勢，飲酒豈顧尚書期。
雕盤綺食會衆客，吳歌趙舞香風吹。
原嘗春陵六國時，開心寫意君所知。
堂中各有三千士，明日報恩知是誰。
撫長劍，一揚眉，清水白石何離離。
脫吾帽，向君笑，飲君酒，爲君吟。
張良未逐赤松去，橋邊黃石知我心。

憶舊遊寄譙郡元參軍

金陵

憶昔洛陽董糟丘，爲余天津橋南造酒樓。
黃金白璧買歌笑，一醉累月輕王侯。
海內賢豪青雲客，就中與君心莫逆。
迴山轉海不作難，傾情創意無所惜。
我向淮南攀

桂枝君留洛北愁夢思不忍別還相隨相隨迢迢訪仙
城三十六曲水迴縈一谿初入千花明萬壑度盡松風
聲銀鞍金絡倒平地漢東太守來相迎紫陽之真人邀
我吹玉笙餐霞樓上動仙樂嘈然宛似鸞鳳鳴袖長管
催欲輕舉漢中太守醉起舞手持錦袍覆我身我醉橫
眠枕其股當筵意氣凌九霄星離雨散不終朝分飛楚
關山水遙余旣還山尋故巢君亦歸家渡渭橋君家嚴
君勇貔虎作尹并州遏戎虜五月相呼度太行摧輪不
道羊腸苦行來北涼歲月深感君貴義輕黃金瓊盃綺

食青玉案使我醉飽無歸心時時出向城西曲晉祠流水如碧玉浮舟弄水簫鼓鳴微波龍鱗莎草綠興來攜妓恣經過其若楊花如雪何紅粧欲醉宜斜日百尺清潭寫翠娥翠娥嬋娟初月輝美人更唱舞羅衣清風吹歌入空去歌曲自繞行雲飛此時行樂難再遇西遊因獻長楊賦北闕青雲不可期東山白首還歸去渭橋南頭一遇君鄼堂之北又離羣問余別恨知多少落花春暮爭紛紛言亦不可盡情亦不可極呼兒長跪緘此辭寄君千里遙相憶

白紵辭

月寒江清夜沉沉美人一笑千黃金垂羅舞縠揚哀音
郢中白雪且莫吟子夜吳歌動君心動君心冀君賞願
作天池雙鴛鴦一朝飛去青雲上

麗人行

杜甫

三月三日天氣新長安水邊多麗人態濃意遠淑且真
肌理細膩骨肉勻繡羅衣裳照暮春蹙金孔雀銀麒麟
頭上何所有翠爲釵葉垂鬢唇背後何所見珠壓腰極
穩稱身就中雲幕椒房親賜名大國號與秦紫駝之峯

山翠釜水精之盤行素鱗犀筋厭飲久未下鸞刀縷切
空紛綸黃門飛輶不動塵御廚絲絡送八珍簫鼓哀吟
感鬼神賓從雜遝實要津後來鞍馬何逡巡當軒下馬
人錦茵楊花雪落覆白蘋青鳥飛去銜紅巾炙手可熱
勢絕倫慎莫近前丞相嗔

怨辭

崔國輔

妾有羅衣裳秦王在時作爲舞春風多秋來不堪着

古意

淨掃黃金階飛霜皎如雪下簾彈箏篴不忍見秋月

長安道

儲光羲

西行一千里暝色生寒樹暗聞歌吹聲知是長安路

長干行

崔顥

君家住何處妾住在橫塘停船暫借問或恐是同鄉

橫江詞

李白

橫江館前津吏迎向余東指海雲生郎今欲渡緣何事
如此風波不可行

蛾眉山月歌

蛾眉山月半輪秋影入平羌江水流夜發清谿向三峽

思君不見下渝州

洞庭湖

洞庭西望楚江分，水盡南天不見雲。
日落長沙秋色遠，不知何處弔湘君。

少年行

王維

新豐美酒斗十千，咸陽遊俠多少年。
相逢意氣爲君飲，繫馬高樓垂柳邊。

夜宿七盤嶺

沈佺期

獨遊千里外，高臥七盤西。
山月臨牕近，天河入戶低。
芳

春平仲綠清夜子規啼浮客空留聽褒城聞曙雞

嶺表寒食

嶺外逢寒食春來不見錫洛中新甲子何日是清明花
柳爭朝發軒車滿路迎帝鄉遙可念腸斷報親情

送張郎中赴隴右省覲卿公

岑參

中郎鳳一毛世上獨賢豪弱冠已銀印出身惟寶刀還
家鄉月迴度隴將星高幕下多相識邊書醉懶操

長門怨

崔顥

君王寵初歇棄妾長門宮紫殿蒼苔滿高樓明月空夜

愁生枕席春意罷簾櫳泣盡無人問容華落鏡中

三陽宮石淙侍宴應制

宋之問

離宮秘苑勝瀛洲別有仙人洞壑幽巖邊樹色含風冷
石上泉聲帶雨秋鳥向歌筵來度曲雲依帳殿結爲樓
微臣昔忝方時御今日還陪八駿遊

行經華陰

崔顥

崑崙太華俯咸京天外三峰削不成武帝祠邊雲欲散
仙人掌上雨初晴河山北枕秦關險驛路西連漢時平
借問路傍名利客無如此處學長生

雅倫

卷二十

李復

送賀監歸四明應制

李白

久辭榮祿遂初衣，向長生說息機。
真訣自從茅氏得，恩波應許洞庭歸。
瑤臺含霧星辰滿，仙嶠浮雲島嶼微。
借問欲棲珠樹鶴，何年却向帝城飛。

贈田九判官梁丘

杜甫

崆峒使節上青霄，河隴降王歎聖朝。
宛馬總肥春苜蓿，將軍只數漢嫖姚。
陳留阮瑀誰爭長，京兆田郎早見招。
麾下賴君才並入，獨能無意向漁樵。

清新

何以謂之清石泉沉似鏡松露冷如冰何以謂之新寶
刀初出匣珠色未成釵無一雜字陳字無一雜言陳言
無一雜意陳意然欲清者多寒儉欲新者多妄誕真能
清新者非古人其誰與歸

感遇

張九齡

漢上有遊女求思不可得袖中一扎書欲寄雙飛翼冥
冥愁不見耿耿徒緘憶紫蘭秀空蹊皓齒奪幽色馨香
歲欲晚感歎情何極白雲在南山日暮長太息

嵩嶽聞笙

劉庭芝

月出嵩山東月明山陰空山人愛清景散髮臥秋風風
止夜何清獨夜草蟲鳴仙人不可見乘月近吹笙絳脣
吸靈氣玉指調真聲真聲是何曲三山鸞鶴情昔去洛
應俗願言聞此曲今來臥嵩岑何幸承幽音神仙樂吾
事笙歌銘夙心

寄遠曲

李白

妾在春陵東君居漢江島一日望花城往來成白道一
爲風雨別此地生秋草秋草秋蛾飛相思愁落暉何時

一相見滅燭解羅衣

潞府客亭寄崔鳳童

王昌齡

蕭條郡城閉旅館空寒烟秋月對愁客山鐘搖暮天新
知偶相訪斗酒情依然一宿阻長會清風徒滿川

巴陵劉處士東齋作

劉生隱岳陽心遠洞庭水偃帆入山郭一宿楚雲裏竹
映秋館深月寒江門起烟波桂陽接日夕數千里嫋嫋
清夜援孤舟坐如此湘中有來雁雨雪候音旨

採蓮曲

王勃

採蓮歸綠水芙蓉衣秋風起浪鳬雁飛桂棹蘭橈下長
浦羅裙玉腕輕搖櫓葉嶼花潭極望平江謳越吹相思
苦相思苦佳期不可駐塞外征夫猶未還江南採蓮今
已暮今已暮採蓮花渠今那必盡娼家官道城南把桑
葉何如江上採蓮花蓮花復蓮花花葉何稠疊葉翠本
羞眉花紅強如頰佳人不在茲悵望別離時牽花憐共
蒂折藕愛連絲故情無處所新物從華滋不惜西津交
佩解還羞北海雁書遲採蓮歌有節採蓮夜未歇正逢
沿蕩江上風又值徘徊江上月徘徊連浦夜相逢吳姬

越女何丰茸共問寒江千里外征客關山路幾重

烏夜啼

李白

黃雲城邊烏夜棲歸飛啞啞枝上啼機中織錦秦川女
碧紗如烟隔牕語停梭悵然憶遠人獨宿空房淚如雨

贈別晉三處士

高適

有人家住清河源渡河問我游梁園手持道經注已畢
心知內篇口不言盧門十年見秋草此心惆悵誰能道
知己從來不易知慕君爲人與君好別時九月桑葉疎
出門千里無行車愛君且欲君先達今上求賢早上書

奉先劉少府新畫山水障歌

杜甫

堂上不合生楓樹怪底江山起烟霧聞君掃却赤縣圖
乘興遠畫滄洲趣畫師亦無數好手不可遇對此融心
神知君重毫素豈但祁岳與鄭虔筆跡遠過楊契丹得
非玄圃裂無乃瀟湘翻悄然坐我天姥下耳邊已似聞
清猿反思前夜風雨急乃是滿城鬼神入元氣淋漓障
猶濕真宰上訴天應泣野亭春還雜花遠漁翁暝踏孤
舟立滄浪水深青溟濶欹岸側島秋毫末不見湘妃鼓
瑟時至今斑竹臨江活劉侯天機精愛畫入骨髓自有

兩兒郎揮灑亦莫比大兒聰明到能添老樹巔崖裏小
兒心孔開貌得山僧及童子若耶谿雲門寺吾獨胡爲
在泥滓青鞋布襪從此始

有所思

賈曾

洛陽城東桃李花飛來飛去落誰家幽閨女兒愛顏色
坐見落花長歎息今歲花開君不待明年花開復誰在
故人不共洛陽東今來空對落花風年年歲歲花相似
歲歲年年人不同

春江花月夜

張若虛

春江潮水連海平海上明月共潮生
滌滌隨波千萬里何處春江無月明
江流宛轉繞芳甸月照花林皆似霰
空裏流霜不覺飛汀上白沙看不見
江天一色無纖塵皎皎空中孤月輪
江畔何人初見月江月何年初照人
人生代代無窮已江月年年望相似
不知江月照何人但見長江送流水
白雲一片去悠悠青楓浦上不勝愁
誰家今夜扁舟子何處相思明月樓
可憐樓上月裴徊應照離人粧鏡臺
玉戶簾中卷不去擣衣砧上拂還來
此時相望不相聞願逐月華流照君
鴻雁長飛光不度

魚龍潛躍水成文昨夜閑潭夢落花可憐春半不還家
江水流春去欲盡江潭落月復西斜斜月沈沈藏海霧
碣石瀟湘無限路不知乘月幾人歸落月搖情滿江樹

鳥鳴澗

王維

人閑桂花落夜靜春山空月出驚山鳥時鳴春澗中

欽湖

吹簫凌極浦日暮送夫君湖上一迴首山青卷白雲

白石灘

清淺白石灘綠蒲尚堪把家住水東西浣紗明月下

竹里館

獨坐幽篁裏彈琴復長嘯
深林人不知明月來相照

送元二使安西

渭城朝雨裊輕塵客舍青青柳色新
勸君更盡一杯酒西出陽關無故人

春夢

岑參

洞房昨夜春風起遙憶美人湘江
水枕上片時春夢中
行盡江南數千里

昭陽曲

劉長卿

昨夜承恩宿未央
羅衣猶帶御爐香
芙蓉帳小雲屏暗
楊柳風多水殿涼

題玉真觀李秘書院

韓翃

白雲斜日影深松
玉宇瑤壇知幾重
把酒題詩人散後
華陽洞裏有疎鐘

侍宴歸雁堂

虞世南

歌堂面綠水舞館接金塘
竹開霜後翠梅動雪前香
鳬歸初命侶雁起欲分行
刷羽同棲集懷恩愧稻粱

後渚置酒

陳叔達

大渚初驚夜中流沸鼓韓寒沙滿曲浦夕霧上耶溪岸
廣鳬飛急雲深雁度低巖關猶未達此夕待晨雞

銅雀臺

王勃

金鳳隣銅雀漳河望鄴城君王無處所臺榭若平生舞
席紛何就歌梁儼未傾西陵松檟冷誰見綺羅情

日暮

杜甫

牛羊下來久各已閉柴門風月自清夜江山非故園石
泉流暗壁草露滴秋根頭白燈明裏何須花燼繁

登安陽城樓

孟浩然

縣城南面漢江流江障開城南雍州才子乘春來騁望
羣公夏日坐銷憂樓臺晚映青山郭羅綺晴嬌綠水洲
向夕波搖明月動更疑神女弄珠游

扈從鄠杜間奉呈刑部尙書舅崔黃門馬常侍

蘇頲

翠輦紅旗出帝京長楊鄠杜昔知名雲山一一看皆美
竹樹蕭蕭畫不成羽騎將過持袂拂香車欲度捲簾行
漢家曾草巡游賦何似今來應聖明

贈獻納起居田舍人澄

杜甫

雅論

卷二十

宋

獻納司存雨露邊地分清切任才賢舍人退食收封事
宮女開函近御筵曉漏追趨青瑣闥晴牕點檢白雲篇
揚雄更有河東賦唯待吹噓送上天

幽秀

空山無人伐木丁丁孤松獨秀映壑臨流是爲幽秀之
極致一涉清浮臺釐千里

太湖秋夕

王昌齡

水宿烟雲寒洞庭霜落微月明移舟去夜靜魂夢歸暗
覺海風度蕭蕭聞雁飛

宿裴氏山莊

蒼蒼竹林暮吾亦知所投靜坐山齋月清溪聞遠流西
峰下微雨向晚白雲收遂解塵中組終南春可遊

終南幽居獻蘇侍郎

儲光羲

卜築青巖裏雲蘿四垂陰虛室若無人喬木自成林時
有清風至側聞樵採音鳳凰鳴南岡望望隔層岑旣言
山流遠復道溪流深倥佯空中遊虬龍水中吟何當見
輕翼爲我達遠心

同雪司直諸公秋霽曲江俯見南山作

高適

南山鬱初霽曲江堪不流若臨瑤池間想望崑崙丘迴
首見黛色渺然波上秋深沈俯崢嶸清淺延阻修連潭

萬木影插岸千巖幽查藹信難測淵淪無暗投片雲對
漁父獨鳥隨虛舟我心寄青霞世事慚白鷗得意在乘
興忘懷在外求良辰自多暇忻與數子遊

下山歌

宋之問

下嵩山兮多所思攜佳人兮步遲遲松間明月常如此
君再遊兮復何時

公子行

劉庭芝

天津橋下陽春水天津橋上繁華子馬聲迴合青雲外
人影搖動綠波裏綠波清迴玉爲砂青雲離披錦作霞

可憐楊柳傷心樹可憐桃李斷腸花此日遨遊邀美女
此時歌舞人娼家娼家美女鬱金香飛去飛來公子傍
的的朱簾白日映娥娥玉顏紅粉粧花際徘徊雙蛺蝶
池邊顧步兩鴛鴦傾國傾城漢武帝爲雲爲雨楚襄王
古來容光人所羨况復今日遙相見願作輕羅着細腰
願爲明鏡分嬌面與君相向轉相親與君雙棲共一身
願作貞松千歲古誰論芳槿一朝新百年同謝西山日
千秋萬古北邙塵

夜歸鹿門歌

孟浩然

山寺鳴鐘晝已昏
漁梁渡頭爭渡喧
人隨沙岸回江村
余亦乘舟歸鹿門
鹿門月照開烟樹
忽到龐公樓隱處
巖扉松逕長寂寥
唯有幽人自來去

薔薇

儲光羲

裊裊長數尋
青青不作林
一莖獨秀當庭心
數枝分作滿庭陰
春日遲遲欲將半
庭影離離正堪玩
枝上嬌鶯不畏人
葉底飛蛾自相亂
秦家女兒愛芳菲
畫眉相伴采葳蕤
高處紅鬚欲就手
低邊綠刺已牽衣
蒲桃架上朝光滿
楊柳園中暝鳥飛
連袂踏歌從此去
風吹香氣

逐人歸

宿無爲觀

元結

九疑山深幾千里峰谷崎嶇人不到山中舊有仙姥家
十里飛泉繞丹竈如今道士三四人茹芝鍊玉學輕身
霓裳羽蓋傍林壑飄飄似欲來雲鶴

辛夷塢

王維

木末芙蓉花山中發紅萼澗戶寂無人紛紛開且落

答韋蘇州

丘丹

露滴梧葉鳴秋風桂花發中有學仙人吹簫弄山月

題崔逸人山亭

錢起

藥徑深紅蘚山牕滿翠微
美君花下醉蝴蝶夢中飛

江行無題

月下江流靜村荒人語稀
鷺鷥雖有伴仍共影雙飛

秋夜寄丘二十二員外

韋應物

懷君屬秋夜散步詠涼天
山空松子落幽人應未眠

青樓怨

王昌齡

香幃風動花入樓高調鳴箏
緩夜愁腸斷關山不解說
依依殘月下簾鉤

春夜洛城聞笛

李白

誰家玉笛暗飛聲散入春風滿洛城此夜曲中聞折柳
何人不起故園情

尋盛禪師蘭若

劉長卿

秋草黃花覆古阡隔林何處起人烟山僧獨在山中老
唯有寒松見少年

聽鄰家吹笙

郎士元

鳳吹聲如隔綵霞不知牆外是誰家重門深鎖無尋處
唯有碧桃千樹花

送張五諶歸宣城

王維

五湖千萬里，況復五湖西。
漁浦南陵郭，人家春穀溪。
欲歸江渺渺，未到草萋萋。
憶想蘭陵鎮，可宜後更啼。

送崔九興宗遊蜀

送君從此去，轉覺故人稀。
徒御猶迴首，田園方掩扉。
出門當旅食，中路授寒衣。
江漢風流地，遊人何處歸。

秋日登吳公臺上寺遠眺

劉長卿

古臺搖落後，秋入望鄉心。
野寺來人少，雲峰隔水深。
夕陽依舊壘，寒磬滿空林。
惆悵南朝事，長江獨至今。

送汾城王主簿

韋應物

少年初帶印汾上又經過芳草歸時徧情人故郡多禁
鐘春雨細宮樹野烟和相望南橋別微風起夕波

送王尊師南歸

司空曙

烟蕪滿洞青山遶幢節飄空紫鳳飛金闕乍看迎日麗
王簫遙聽隔花微多開石髓供調膳時御霓裳奉易衣
莫學遼東華表上千年始欲一回歸

咸陽城東樓

許渾

獨上西城萬里愁蒹葭楊柳似汀洲溪雲初起日沉閣

山雨欲來風滿樓
鳥下綠蕪秦死夕
蟬鳴黃葉漢宮秋
行人莫問當年事
故國東來渭水流

憶夜直金鑾奉詔

李紳

月當銀漢玉繩低
深聽簫韶碧落齊
門壓紫微高綺樹
閣連青瑣近丹梯
墨宣外渥催飛詔
草定新圖促換題
明月獨歸花路遠
可堪人世隔雲霓

過繡嶺宮

崔塗

古殿春殘綠野陰
上皇曾此駐泥金
三城帳屬昇平夢
一曲鈴關悵望心
苑路暗迷香輦絕
繚垣秋斷草烟深

前朝舊物東流在猶爲年年下